

# MEJE PO CARTE COPIYA PEDRO TATINA, POMONAE JESUCRISTO PEJUME COWŪNTSIWI TATINATSI

---

Meje yabara poxonaē Pedro tamropata pitaba xua tatina pomonaetha pomonae Jesucristo pejume cowŭntsiwichi

**1** <sup>1</sup>Xan, Pedron, Jesucristo pia peitorobi jiwi jiwana tatsin. Daxita barapomonaē pam pacata tinatsi pomonae painya nacua nacayayatsiya pawŭ jinompame xua ichamonae painya nepaca yotabixae. Pomonae painya nejinompaewi pam Ponto nacuatha, irŭrŭ pomonae painya nejinompaewi pam Galacia nacuatha, irŭrŭ Capadocia nacuatha painya nejinompaemdŭ, irŭrŭ Asia nacuatha painya nejinompaewi pamdŭ, irŭrŭ Bitinia nacuatha painya nejinompaewi pamdŭ. <sup>2</sup>Caena bayatha poxonaē aena, bapoxonaē Nacom paca itapeta. Barapon Nacom, pon Waxa, paca yaputane xua pia pexui tatsi pana naexaname. Nacom pia Pejumope tŭnaxŭ tatsi paca exana xua bichocono pajŭntŭ coyene xanepaname Nacomtha painya neexanaenexa pocotsiwa Nacom paca itoroba. Poxonaē Jesucristo paca tsitŭpa naetotha jana pichapabarena painya nejume cowŭntsinexa Jesucristo pocotsiwa bapon paca itoroba. Bapoxonaē pajŭntŭ coyene xanepaname Nacomtha. Barabŭ Nacom bichocono paca yawenaena pia paca necaantobewaxae. Matautano barabŭ barapon jŭntema jinompa paca exana.

Meje yabara xua po coyeneya bewa beta jinompaetsi Jesucristo nexa

<sup>3</sup>Nacom wŭnaē jaintatsi pon Jesucristo Paxa tatsi. Jesucristo bapon pon Wanacanamataxeinaein. Nacom jeichichi: “Nacom maisa pajŭntŭ coyene weiweinan xua pena jŭntŭ coyenein patanecatsibiwam xua poxoru bichocono nantanuweya pana yabara nanta xeiname. Baxua painta exaname poxonaē Jesucristo equeicha asŭ exaname petŭpae cuiru coyene weya”, jeichichi. Jesucristo naca cana exana xua wŭnaeya jume

cowuntsiya ewatatsi xua Nacom naca catsina peajuntuyaruswa. <sup>4</sup>Bara Nacom paca catsibina pocotsiwa paca juntana jeba pia nacuatheicha pocotsiwa xua jopa itacupaetsi xua peweraweracaewa xua matauta jopa abe caquiyo. Matauta jopa abe tsoponaeyo xua jopa daichiyo icha pentono ichi. <sup>5</sup>Nacom paca yapu eena pia peayapusuwatha painya neyabara jume cowuntsixae bapon. Barapon Nacom paca capanepa xua jopa painya neatenenexa xua abe painya neexanaexae xua poxonae daxita barapo nacue weraweracaena.

<sup>6</sup>Daxota pajuntu coyene weiweiname, bara bequein saya cae dapaeyobetha paca ajuntucoyenerewe exana xua ichamonae abe painya nepacata exanaexae matowa. <sup>7</sup>Barapo painya nepaca caajuntucoyenerewe exanaewan piraichi pacata exana baxua xua pia yaputaetsi icha xaniwaicha bara metha pajume cowuntame Jesucristo. Po penainto pewun oro nainto, jiwi ba piraichi isototha tauta peyaputaenexa icha bara metha pepa oro nainto. Po pejume cowuntsiwa jiwi xeina bichocono daunwei beyacaincha oro nainto bequein ichamonae juntu coyene jujuta xua abe peexanaenexa. Barapo oro nainto weraweraca. Barapoxonae poxonae Jesucristo patopaetsica xua awiya beta painya nejume cowunta dubenanaebiyaexae daxota Nacom wnae paca jainchina. Matautano paca cana exanaena xua peainya cui jiwi pam. Matautano paca cana exanaena xua jiwi paca baru cui itura jinaena painya nejume cowuntsiwixae.

<sup>8</sup>Paxam paantobem Jesucristo bara bequein jopa bapon pataem. Matautano anoxuae pajume cowuntame bequein jopa bapon anoxuae pataem. Paxam bichocono pajuntu coyene weiweiname. Bara bequein barapo pexeinya pejuntu coyene weiweinae coyenewa bayatha payabara paebame daichitha awiya pacata seica xua po jumetha beta payabara paebame barapo peajuntucoyeneswa. Daxota bichocono pajuntu coyene weiweiname tsipei pananta xeiname xua painya nexainaewa tsane pebaru cui itura jinaewa Nacom pia nacuatheicha. <sup>9</sup>Painya nejume cowuntsixae Jesucristo, Nacom paca juntu coyene capanepaena xua jopa painya neatenenexa xua abe painya neexanaexae.

<sup>10</sup>Caena bayatha pomonae Nacom pia peitorobi jume pepaebiwi yabara jejeitaponeiba nawita barapo pecapanenebiyae diwesi, xuano yabara yainyabeiba nawita. Barapomonae yabara paeba pecapanenebiyae diwesi, xua Nacom paca catsibina barapo diwesi pia paca necaantobexae. <sup>11</sup>Nacom pia Pejumope tunaxu tatsi, po jumope Cristo weya pona, barapo jumope cueicueijeji barapomonae pejuntu coyenewatha tatsi. Nacom pia Pejumope tunaxu tatsi cueicueijeji barapomonaetha, jeye: “Payabara tinare xua bexa tsane Cristo, pon Nacom itorobina, atene tsane. Matautano bapon Cristo xeinaena pexeinya peitupanae coicha”, jei. Barapomonae nayainyaba, jeye: “¿Eta bichi tsane jiwitha poxonae

baxua exanaena? ¿Yawa eta poxonae metha baxua exanaena?” najei barapomonaē. <sup>12</sup>Ichitha Nacom, barapomonaē yabara yaputane exainchi xua po diwesi barapomonaē xua Jesucristo yabara tsiwūnaē paeabatsi apara jopa barapomonaē nexa. Apara jame barapo diwesi paxam nexa. Po diwesi xua caena bayatha barapomonaē yabara paeba barapo diwesi jūpa po diwesi xua anoxuae ichamonaē yabara paca tsipaeba. Barapo diwesi xua pecapanenebiyae diwesi barapomonaē paca tsipaeba Nacom pia Pejumope tūnaxū tatsi pia peayapusū itorobi coyeneyatha tatsi po jumope itorobatsi itaboco wetsica. Barapomonaē yabara paeba barapo pecapanenebiyae diwesi po diwesi matatsunpiwi bequein irū ichichipa yabara yaputane.

**Meje yabara xua Nacom naca itoroba xua bewa  
xeinaetsi pepa pejūntū coyene xanepanaewa**

<sup>13</sup>Daxota pana najūntū coyene wūnaere Nacom nexa xua pana najūntū coyene itorobare xua barompaya painya nenanta xeinaewatha. Ajūntūyapusūya payabara jume cowūntsiya eware pocotsiwa Nacom paca catsibina pia paca necaantobewaxae xua poxonae Jesucristo patopaetsica. <sup>14</sup>Paexande icha pexui ichi xua ba exana pocotsiwa coxiyūn itoroba. Jopa paichichipaeinde xua abe paexaname po coyenewa icha be paichim copiya xua abe paexaname poxonae cataunxuae jopa payabara yaputaem Nacom. <sup>15</sup>Seicaya pajinompere pepa painya nejūntū coyene xanepanaewatha, tsipei Nacom pon paca waba bichocono pepa pejūntū coyene xanepanaein. <sup>16</sup>Baxua paexande poxoru Nacom Pejume Diwesitha jeye: “Paxam daxita bichocono pajūntū coyene xanepande, tsipei bichocono tajūntū coyene xanepanaein”, jei.

<sup>17</sup>Nacom Waxa, pon jiwi peyabara paebin xua penatsicuentsiwa xua abe peexanaexae, barapon Nacom jopa nanta xeinaeyo xua ichūn bichocono peainya cuin beyacaincha ichūn. Icha paxam barapo Nacomtha pajam: “Axa”, pajam, xua pia painya nepaca yawenaenexa bapoxonaē pajunuware xua abe painya neexanaeyainwa Nacomtha. Mataūtano barapon Nacom bichocono paantobeinde daxita matakabin poxonae pajinompame po irathe. <sup>18</sup>Jesucristo paca capanepa painya abeya nejinompaewa weya. Poxonaē Jesucristo paca yantomata xua paca capanenebiya, jopa catsiyo po penainto pewūn oro nainto. Mataūtano jopa catsiyo po penainto pewūn plata nainto. Barapo naxobe penaintobe saya weraweraca. Barichino payaputaneme xua Jesucristo jopa paca capanepaeyo tsipei bara paichim xua paexaname icha painya amo susato jiwi ichi xua barapo abeya jūntū coyenewatha jinompa. Baxua paca yawena aibi. <sup>19</sup>Saya meisa Cristo naca yantomata abe waexanaē cuiru coyenein weya. Baxua apara xua poxonae Jesucristo naca tsitūpa naetotha, icha caena bayatha oveja ichichi xua poxonae bexotsi xua tūpa

exanatsi xua Nacom peyabara jüntemainaenexa jiwi abe pia peexanae cuiru coyenein tatsi. Barapo oveja pexeinya oveja xua jopa matauta xeinaeyo wanyo, icha Cristo ichi xua jopa xeinaeyo peabe coyenewa tsipei pejüntu coyene xanepanaein. <sup>20</sup>Nacom itapeta xua Cristo itapetatsi petupaenexa tsane naetotha caena bayatha poxonae cataunxuae jopa forotsiyo po cae pin nacue. Nacom paca tsita ituta bapon Cristo barapo petabu ducuae matabitha. <sup>21</sup>Cristo painya nepaca tsitupaexae naetotha xua abe painya neexanae cuiru coyenein daxota Nacom pajume cowuntame. Nacom equeicha Cristo asu exanatsi petupae cuiru coyene weya. Matautano Nacom pia nacuatheicha cana exana bapontha xua xeina pepa peainya cui coyenewa. Daxota anoxuae pajume cowuntame Nacom. Matautano pajume cowuntsiya ewatame Nacomtha xua bexa Nacom paca catsina pocotsiwa xua bayatha yabara paca tsiwunae muxu duta.

<sup>22</sup>Anoxuae pajume cowuntame Nacom pia pexainyei diwesi jume xua Nacom pia Pejumope tñaxu tatsi paca tsipaeba. Daxota paca itacupa xua pana najüntu coyene wunae exaname Nacomtha xua xaniwaicha painya neantobenexa ichamonae pomonae iru pejume cowuntsiwi Nacom. Daxota bewa bichocono nantiya pana naantobem daxita painya nejüntu coyene daunweyatha. <sup>23</sup>Paxam icha jüntu coyene paxename tsipei be pena jiwi pana naexaname, xua pajüntu coyene xanepaname. Jopa panaexanaem xua pocotsiwa peweraweracaewa werena. Anoxuae nama panaexaname pocotsiwa xua jopa peweraweracaewiyo werena. Ichitha pena jiwi pana naexaname painya nejume cowuntsixae Nacom Pejume Diwesi, po jume diwesi jopa weraweracaeyo, xua ataya tsitecapona.

<sup>24</sup>Nacom Pejume Diwesi jeye:

“Naepanaewa ba tsewa tsoponae

yawa pentono ba othopeica.

Icha naepanaewa ichi jiwi ba barichi,

ba werapa.

Matautano pocotsiwa jiwi exana xua bequein

tsita ainya cuichi ichitha weraweracaena.

<sup>25</sup>Ichitha nama Nacom Pejume Diwesi ataya

ayapusu tsoponae”, jei Nacom Pejume Diwesitha.

Barapo diwesi apara pecapanenebiyae diwesi xua po diwesi paca tsipaebatsi.

**2** <sup>1</sup>Daxota daxita pana nacui barapende daxita abe peexanae cuiru coyenein, yawano xua pemuxuitorobi coyenewan, yawano xua naerabiya peexanae coyenewan xua naemata wunae pepaebiwa, yawano xua peyabara uwi coyenewan xua ichun xeina, yawano xua abe peyabara paebiwa ichamonaetha xua ichun peyabara paewiatsi. <sup>2</sup>Pexui ba poxi anoxuaetha naexana ba jeita mito pia apaetsi xua pewichibinexa

peapaexae mito. Icha pexui ichi, barapocotsi jũta coyeneya paichinde. Saya ı meisa Nacom Pejume Diwesi payarobare nawita xua painya nejume cowũnta dubenanaebiyaenexa tsane, mataũtano xua painya nepaca capanenebiyaenexa tsane Nacom. <sup>3</sup>Icha paita coxoneme Nacom, painya jũntı coyenetha bara payaputaneme xua pon jiwi Pecanamataxeinaein bichocono bara pewũnaein.

### Meje yabara iboto, po iboto peainya cui iboto

<sup>4</sup>Jesucristo pajume cocowũntaponde, pon jiwi Pecanamataxeinaeinchi, pon xua ataya tsitecaeya ajũntıyapısuıya pepoponaein. Barapon Jesucristo yabara caunutatsi be pocotsi iboto xua copiya boca xua poxonae bomıxı exana. Icha jiwi ichi xua barapo iboto xuba jiwi barichi Jesucristo pentatsi. Ichitha Nacom itapeta xua Jesucristo itapetatsi, tsipei bapon Jesucristo Nacom tsita ainya cuichi. <sup>5</sup>Poxonae jiton ibo bo exana xua Nacom pin pia bo nexa, itapeta po iboton wũnae. Bara jıtiya ichi Nacom itapeta jiwi, xua pomonae piamonae tatsi cana exana pomona pejume cowũntsi jiwichixaetsi. Painya coutha pana najũntı coyene doure Nacomtha beta painya netanacuichinexa icha sacerdotemonae ichi xua najũntı coyene douta Nacomtha poxonae beta tanacuita. Poxonae baxua paexaname bara baxua Nacom tsita xanepanatsi xua Jesucristo painya nejume cowũntsixae. <sup>6</sup>Nacom Pejume Diwesitha jeye:

“Pajume taema, itorobarecan Jesucristo

Sıon tomaratha tana nejume

cowũntsiwi taitorobarecan.

Bapon itapetan xua bichocono peainya

cuixae, icha iboto ichi, po iboto

babatanota bomıxı.

Pon Jesucristo jume cowũntatsi bapon jopa

aura tsane xua bapon Jesucristo pejume

cowũntsixaetsi”, jei Nacom Pejume Diwesitha.

<sup>7</sup>Painya nejume cowũntsixae bapontha, daxota payaputaneme xua bapon bichocono asiwiya paantobem. Ichitha pomonae jopa bapon jume cowũntsiichi barapomona canacui yabara jume wetatsi be pocotsi coyeneya bayatha Nacom Pejume Diwesi paeba, xua Jesucristo yabara caunutatsi, jeye:

“Po iboto xua jiwi naitemata xua pomonae

ibo bon peacabiwi, barapo iboto

pecanamatawenonae ibotatsi naexana”,

jei Nacom Pejume Diwesi, xua Jesucristo

yabara caunutatsi.

<sup>8</sup>Nacom Pejume Diwesitha equeicha jeye:

“Barapo ibotiyotha jiton taxu aũtabatsi.

Matautano barapo iboto, ichacuitha  
jiton xuirapopa exainchi”,  
jei Nacom Pejume Diwesi.

Jiton ba xuirapopa poxoru jopa taeyo barapo iboto. Po iboto Nacom yabara paeba barapo iboto Jesucristo yabara jutsiya canautapaebatsi. Jiwi jopa beta exanaeyo poxoru jopa jume cowuntsiyo xua Nacom Pejume diwesitha Jesucristo yabara paebatsi. Caena bayatha Nacom pewunaeya yabara cui yaputane xua barapomonae peexanaewa tsane baxua.

<sup>9</sup>Paxam Nacom painya nepaca itapetsi jiwi pam. Paxam po sacerdotemonae pam xua pata nacuitame Nacom pon jiwi itorobiya pia pepa Peewatsinchi. Matautano paxam pomonae Nacom patsita juntu coyene xanepaname jopa painya tsita natsicuentisixae bapon. Matautano Nacom pia pepa piamonae tatsi pam. Nacom baxuan pacata exana pia painya yabara netacueicueijeinexa xua pia pexeinya petsita itubi coyenewan tatsi. Barapon Nacom paca waba abe painya neexanae cuiru coyenein weya. Paca waba pia painya yabara neyaputaenexa Nacom xua xeina pexeinya peitupanae coicha. <sup>10</sup>Copiya paxam jopa Nacom piamonae tatsi pam, ichitha anoxuae nama Nacom piamonae tatsi pam. Matautano copiyatha jiwi jopa paca yabara nantanuweya nanta xeinaeyo xua pia paca necayawenaewa tsane. Ichitha anoxuae Nacom paca yabara nantanuweya nanta xeina xua pia paca necayawenaewa tsane.

**Meje yabara xua jiwi bewa beta jinompae xua Nacom  
petanacuita dubenanaebiyaenexatsi**

<sup>11</sup>Tamonae pam, pomonae tapaca caantobe jiwichi pam. Paxam pomonae be penanapaincha jinompaewi pam xua icha nacua werena painya neponaewi. Daxota paca itorobatsi xua jopa painya neexanaewa tsane pocotsiwa abe pocotsiwa xua painya juntu coyenewatha ichichipa xua peexanaewa. Barapo abe peexanae cuiru coyenein paca juntu coyene itoroba bichocono xua painya neexanaenexa po coyenein abe peexanae cuiru coyenein. <sup>12</sup>Beta pajinompare Nacom nexa xua peitutha tatsi pomonae Nacom jopa jume cowuntsichi. Icha barapomonae abe paca yabara paebichipa be pomonae abe painya neexanae jiwi pam tsipae bichocono daichitha barapomonae taena xua beta painya neexanaewa. Bapoxonae barapomonae Nacom wuna jaintinchi wuna painya neexanaexae xua po mataqueitha Nacom yabara paebina jiwi xua penatsicuentisiwa xua abe peexanaexae.

<sup>13</sup>Painya nejume cowuntsixae pon jiwi pepa Pecanamataxeinaeinchi bara paexande pocotsiwa paca itoroba daxita pomonae pecanamataxeinaewi painya nacua. Matauta paexande pocotsiwa paca itoroba pon romanomonae itorobiya pepa peewatsinchi. Jame Nacom ichichipa xua waexanaewa baxua. <sup>14</sup>Paexande pocotsiwa

paca itoroba pomonae nacuan peewatsiwi pomonae xua tanacuitatsi pon romanomonae itorobiya pepa peewatsinchi. Nacom itoroba barapomonaetha pomonae nacua peewatsiwi xua barapomonae cuainchina pomonaetha pomonae abe peexanaewi. Matautano Nacom itoroba barapomonaetha xua wunae jainchina pomonaetha pomonae beta peexanaewi. <sup>15</sup>Nacom ichichipa xua beta painya neexanaewa tsane pomonaetha pomonae xua jopa Nacom yabara yaputaetsi xua barapomonae pemoyanexa xua jopa abe painya nepaca yabara paebinexa.

<sup>16</sup>Pajinompare, icha be ichi pomonae jopa nantawenonaeyo xua ichamonae amanaya petanacuichiwatsi. Ichitha jopa abe paexanaeinde xua poxoru saya painya nejinompaexae. Beta pajinompare, icha be ichi pomonae Nacom amanaya tanacuita dubenanaebiyatsi. <sup>17</sup>Beta payabara nanta xeinare daxita jiwi. Matautano paantobeinde ichamonae pomonae iru pejume cowantsiwi Jesucristo. Nacom pacunuware xua abe painya nepaca exanaeyainwa, xua abe painya neexanaexae. Pabarũ cui itura jinareno pon romanomonae itorobiya pepa peewatsinchi.

#### **Meje yabara po coyene xua Cristo atene peexanaewatsi**

<sup>18</sup>Paxam pomonae amanaya painya netanacuichi jiwi pam ichamonae barapomonae pam paca tsipaebatsi. Bewa pajume baru cui jejam tsaibim tsane pomonae xua paca itorobeiba pomonae painya nepaca canamataxeinaewi. Baxua paexande poxonae bequein ichamonae wunae peexaneibiwi, matautano xua poxonae ichamonae bequein abe peexaneibiwi poxonae paca itoroba. <sup>19</sup>Baxua Nacom tsita wunaetsi xua pabarũ cui itura jiname barapomonae pomonae painya nepaca canamataxeinaewi xua poxonae bequein paca cuainta barapomonae xua xaniwaicha painya neexanaexae painya nejume cowantsixae Nacom. <sup>20</sup>Icha abe paexaname xua daxota paca cuainta, baxua Nacom jopa tsita coyene xanepanaetsi xua bequein saya beitatemaya moya paumename poxonae paca cuainta. Ichitha icha jame paca cuainta xua wunae painya neexanaexae xuano xua icha beitatemaya moya paumename baxuan jame Nacom tsita coyene xanepanatsi. <sup>21</sup>Xua ichamonae atene painya nepaca caexanaexae daxota Nacom itapeta paca waba. Ichamonae Jesucristo atene exainchi waxainchi nexa. Jesucristo cana caunutsiya exanatsi xua waxainchi bewa exanaetsi icha bapon ichi xua pocotsiwa exana. <sup>22</sup>Bapon Jesucristo bapana jopa abe exanae. Matautano bapana jopa muxuitorobi ichamonaetha. <sup>23</sup>Poxonae ichamonae Jesucristo biatainchi jopa xuya jume barabotsiyo Jesucristo. Poxonae Jesucristo butsi, jopa Jesucristo jeyo, “Aunxuae xuya paca cuaintinchi”, jopa jeyo. Ichitha Jesucristo jume cowanta Nacom xua pocotsiwa poxonae Nacom exanaena barapomonaetha pocotsiwa xua be Jesucristo peyantomatsiwatsi. Tsipei Nacom xaniwaicha beta yabara paeba jiwi, xua penatsicuentsiwa

xua abe peexanaexae. <sup>24</sup>Cristo pia pepontha yawa muxuna tupa abe waexanae cuiru coyenein poxonae tupa naetotha. Poxonae bapon Jesucristo nacata exana barapo coyene, waxainchi abe waexanae cuiru coyenein weya panenebiyatsi xua jopa equeicha waexanaewa tsane abe waexanae cuiru coyenein, yawano xua beta juntu coyene xanepanaya jinompaeinchi Nacomtha. Daxota Cristo wan exanatsi xua equeicha jopa abe painya neexanaenexa tsane. <sup>25</sup>Ichacuitha oveja itaxanuncuatsi, pipato pepoponaexae jopa penantauntsixae pon peanaein ovejan. Icha oveja ichi paxam bara pocotsi juta coyeneya paichim. Copiya jopa xanepanaya painompaem, jopa painya nenantauntsixae Jesucristo. Ichitha anoxuae xanepanaya pajinompame, tsipei anoxuae Jesucristo panantautame pon paca yawena. Bapon nepaca eenaen, icha be ichi pon oveja peanaein. Yawano bapon Cristo paca juntu coyene canamataxeina.

### Meje yabara xua po coyeneya bewa jinompae pomonae jitha peanaewi

**3** <sup>1</sup>Paxam powaxi jitha painya neenaewaxi pam, paexande pocotsiwa painya seuriwi paca itoroba. Painya pebiwi ichacuitha jopa jume cowuntsiyo Nacom. Painya neexanaexae pocotsiwa painya seuriwi paca itoroba barapo painya seuriwi jume cowuntsina Nacom painya nepaca cui taexae bara bequein Jesucristo jopa payabara paebim. <sup>2</sup>Barapo painya seuriwi paca taena xua Nacom paantobem. Yawano xua paca taena xua juntu coyene xanepanaya painompaem. <sup>3</sup>Jopa metha meisa painya pepon pexeinyowa pana naexanaemtsipaem, xua daxota jiwi painya nepaca yabara paebeibiwa, xua pexeinyowaxi pam. Jopa matowa pana mata cachetsinde xua bichocono pexeinyowa pana naexaname. Jopa pana napepenaeinde po penaintotha pewun oro nainto. Matautano jopa pana nama xatabinde po paparuwan bichocono ainya matoman xua bichocono pexeinyowaxi pana naexaname. <sup>4</sup>Icha pexeinyowaxi ichichipa pana naexaname moya maisa pana najuntu coyene wuna exande. Barapo pexeinyowa coyenewa bupana xeina jiwi pejuntu coyenewatha. Barapo pexeinyowa coyenewa jopa itacupaetsi xua peweraweracaewa. Painya pexeinyowa coyenewa bewa payabara ita ururanaya pajinompam, yawano juntea pajinompam. Baxuan jame bichocono tsita coyene xanepanatsi Nacom. <sup>5</sup>Barapo pexeinyowa coyenewa caena bayatha xeina po yabuxi xua bichocono pepa pejuntu coyene xanepanaewaxi. Barapo yabuxi jume cowuntsiya ewata Nacomtha, xua Nacom exanaena pocotsiwa yabara tsiwuna muxu duta. Matautano barapo yabuxi exana pocotsiwa piseuriwi itorobatsi. <sup>6</sup>Petsiriwa powa pewun Sara bara jutiya ichiya exana. Barapowa exaneiba pocotsiwa piseuri itorobeibatsi pon pewun Abraham. Barapowa piseuritha jeye: “Tanecanamataxeinaem”, jei bapowa. Paxam bara paichim tsane icha barapowa Sara ichi icha beta paexanaename, yawano xua jopa pajunuwim, bequein painya seurixi jopa xanepanaya paca itorobeibiyo.



<sup>7</sup>Barichi pam pebiwi pam, po pebiwi painya seuriwi painya nexeia nae jiwi pam. Beta payabara cui yaputaema painya seuriwi. Yawano painya seuriwi pabarũ cui itura jinare tsipei yabuxi jopa acuicoyenesũyo icha jopa be pebiwi ichiyo. Pananta xeinare xua pebin piseuribe xeinabe po peajũntũyapusũwa jopa bapana weraweracae, po peajũntũyapusũwa Nacom cata piamaetha pomonae pia peantobewixaetsi. Baxua paexande painya seuriwitha xua wũnae painya neexanaewa xua Nacom bara beta painya nepaca jume taenexa poxonae pawũcame.

**Meje yabara xua jiwi atene pomonae xua beta peexanaewixae**

<sup>8</sup>Matapainya paca tsipaebatsi nantiya beta jinompa pana naexande. Yawano nantiya beta pana nayabara nanta xeinare xua painya nenayawenaexaem tsane. Nantiya pana naantobeinde painya nejume cowũntsixae Nacom, icha be ichi poxonae barompaya painya eweicho jiwi nantiya pana naantobem. Pomonae jiwi peyawenae jiwi pana naexande xua painya neantobexae barapo jiwi. Matautano jopa bichocono painya coutha pana nayabara nanta xeinaeinde. Jame maisa ichamonae itapeta bichocono payabara nanta xeinare. <sup>9</sup>Poxonae ichamonae abe pacata exana xuya jopa paexanaeinde. Yawano poxonae ichamonae paca biatane jopa xuya pabiataeinde. Seicaya nama paexande. Jame Nacomtha patawũcare barapomonae xua Nacom pecana exanaenexa xua barapomonae pejũntũ coyene weiweinaenexa. Daxota Nacom paca waba xua xuya pacata exana tsipei barapomonae beta pacana exaname. <sup>10</sup>Tsipei Nacom Pejume Diwesitha jeye:

“Pon xua antobe xua po coyene cataunxuae pepoponaewa, xuano xua daxita matacabi jũntũ coyene weiweina poneiba, bapon bewa peebatotha jopa paebi tsane peabe jumeyo. Matautano peopiratotha jopa bewa paebi tsane xua ichamonae naerabiya peyabara paebiwatsi.

<sup>11</sup>Bewa taju beya paponam xua peabe coyenewan weya.

Yawano saya bewa beta paexanaem. Itapeta paexande pocotsiwa xua jiwi jũntema jinompa exainchi.

Bara ajũntũyapusũya paexanaponde baxua.

<sup>12</sup>Tsipei Nacom, pon jiwi Pecanamataxeinaein, yawena pomonaetha pomonae pejũntũ coyene xanepanaewi.

Yawano Nacom jume tane xua pewũcaewatsi. Ichitha Nacom jopa yawenaeyo pomonae abe peexanaewi”, jei Nacom Pejume Diwesitha.

<sup>13</sup>Dapon aibi pon itacupatsi xua abe pacata exana icha saya paexaneibame pocotsiwa xua wuna. <sup>14</sup>Bequein icha ichamonae pacata abe exanaena juntũ coyene xanepanaya painya nejinompaexae, daichitha Nacom paca cana exana xua pajuntũ coyene weiweinaya jinompame. Jopa ichamonae pacunuwinde, yawano jopa pacuitaya juntũ deideijande. <sup>15</sup>Jame maisa Cristo bichocono payabara nanta xinare painya juntũ coyenetha xua bapon bichocono ainya cui. Pajande: “Pon jiwi Necanamataxeinaem”, pajande. Pana najuntũ coyene wunaeteibare xua painya nejume noteibinexa pomonae paca yainyabiya jeye: “¿Eta pocotsiwa pajume cowantsiya ewatame xua Jesucristo bexa paca capanepaena?” paca jei. <sup>16</sup>Ichitha saya ita ururaquiya pajume noteibare, jopa paaebibinde. Yawano pajunuware Nacomtha xua abe painya nepaca exanaeyainwa Nacom, abe painya neexanaexae. Pajinompare xua painya juntũ coyenewa paca tsipaeba xua wuna bara paexaname. Bapoxonae icha ichamonae abe paca yabara paeba, barapomonae aura tsane xanepanaya painya nejume cowantsiya jinompaexae Cristo.

<sup>17</sup>Ichha Nacom ichichipa xua ichamonae atene paca exana, beta painya neexanaexae, baxua jame wuna, beyacaincha xua poxonae atene paca exana poxoru abe paexaname. <sup>18</sup>Tsipei Cristo atene exanatsi poxonae tsitupa abe waexanae cuiru coyenein daxita xua poxonae cae coyenetha tupa. Cristo bapana jopa abe exanae. Ichitha bapon Cristo naca tsitupa pomonae abe waexanae jiwichi. Baxua Cristo nacata exana, xua wanaca exanaenexa xua wapatsiwa tsane Nacom beicha. Bapon Cristo bequein tupa pepon ichitha equeicha asũ exanatsi pia pejumope tunaxũ tatsi. <sup>19</sup>Bapoxonae Jesucristo pia pejumope tunaxũ tatsi pona ichaxota jiwi pia pejumopein tatsi be cubathopeibatsi pomonae xua caena bayatha werapa. Barapon Jesucristo pia jumope tunaxũ tatsi yabara cueicueijei barapo jumopeintha xua Nacom pia pecapanenebiyae diwesi tatsi. <sup>20</sup>Caena bayatha barapomonae jopa jume cowantsiyo Nacom poxonae po mataqueitha Noé popona po irathe. Nacom beitatemaya ewateiba barapomonae, ainya dapaen xua pejume cowantsinexatsi poxonae xua cataunxuae Noé cobe naemata xua pin jera nae exana. Ichitha saya ocho poyobe jiwi panenebiya poxonae bichocono awũbo xua butuxuba po cae pin nacue. <sup>21</sup>Barapo awũbo caunuta xua be naca bautisaba. Poxonae naca bautisaba apara jopa wanaca peru iquicaenexa tsane xua tsoreichi, apara jame daxota naca bautisaba Nacom, wanaca capanepaexae abe waexanae cuiru coyenein weya. Yawano Nacom wucatsi xua wanaca juntũ coyene xanepana exanaewa tsane. Bapoxonae wajuntũ coyene naca tsipaeba xua bara beta exanatsi. Waxainchi naca itacupa xua wanaca bautisabiwa tsipei Jesucristo equeicha asũ exanatsi petupae cuiru coyene weya. <sup>22</sup>Jesucristo peitaboco beicha pona. Bapon Jesucristo eca Nacomtha, xua Nacom pia pecoxa weya tatsi. Matatsunpiwi, iruru pomonae itoroba itabocotha barapomonae exana pocotsiwa Jesucristo itoroba.

**Meje yabara xua jiwi bewa beta tanacuichi Nacom icha be po coyeneya  
Nacom cata jiwi barompaya pia peexanae coyenewan tatsi**

**4** <sup>1</sup>Yaitama copiya Cristo atene exanatsi ichamonae, waxainchi daxota bewa nanta xeinaetsi xua iru naca atene exanaena ichamonae. Pon atene exanatsi ichamonae bapon abe pia peexanae cuiru coyenein wepu pona xua bichocono pejume cowuntsixae Jesucristo. <sup>2</sup>Paxam jopa bewa paexanaem pocotsiwa xua paichichipame xua abe painya neexanaewa poxonae cataunxuae pajinompame. Ichitha cataunxuae paexanaponde pocotsiwa Nacom ichichipa poxonae cataunxuae pajinompame barapo cae pin nacuathe. <sup>3</sup>Caena bayatha paexaname pocotsiwa xua ichamonae exana pomonae jopa yaputaeyo Nacom. Barapomonae abe exaneiba xua nasi cui exana icha yabuxitha xua jopa piseuriwi. Yawano exaneiba xua pocotsiwa abe yabara nanta xeina pejuntũ coyeneintha. Yawano nacupa exaneiba peatsaxae meran. Yawano pin penabanaewan exaneiba po penabanaewantha jiwi weiweinaya abe exana xua napenajuba yawa bichocono cupatsi. Yawano ibo nacomun wunaẽ jainteibatsi. <sup>4</sup>Pomonae jopa yaputaeyo Nacom, barapomonae paca cui yabara nanta xeina, jeye: “¿Eta xua metha jopa naca baru exanaeyo xua waxainchi abe exanatsi?” najei barapomonae. Barapomonae paca cui capana yawa daxota abe paca yabara paeba. <sup>5</sup>Payabara nanta xeinare pomonae abe exana. Barapomonae bewa yabara caununaya jume notsina Nacomtha pocotsiwa xua abe exana. Nacom yabara paebina pomonaetha pomonae xua cataunxuae jinompa yawa pomonaetha pomonae bayatha werapa xua penatsicuentisiwa xua abe peexanaexae. <sup>6</sup>Daxota Nacom Pejume Diwesi bayatha cueicueijei pomonaetha pomonae bequein bayatha werapa xua barapo pewerapae jiwi pejumope tunaxun pejinompaenexa tsane icha Nacom ichi xua popona. Bayatha Nacom yabara paeba barapomonae xua penatsicuentisiwa xua abe peexanaexae barapo cae pin nacuathe xua daxota pia pepon tatsi werapa icha daxita jiwi ichouneibi.

<sup>7</sup>Bara nama imoxoyo po dapaetha poxonae Nacom daxita weraweraca exanaena barapo cae pin nacue. Daxota painya coutha pana najuntũ coyene itorobare xua xanepanaya paexaname Nacomtha beta painya wucaenexa tsane. <sup>8</sup>Pocotsiwa xua ainya cui xua jame bewa bichocono nantiya pana naantobeinde. Poxonae ichun paantobem, pajuntemainame poxonae bequein xua bapon abe pacata exana. <sup>9</sup>Paxam nantiya pana nantenta weyataeya wabeibare painya boxitha xua painya nenaapateibinexa tsane, xua jopa pana naita aenae-aenande. <sup>10</sup>Daxita barompaya paxam Nacom paca cana exana xua painya nexainaewa barompaya painya neexanae coyenewan. Paxam nantiya pana nayawende barapo cui coyenetha, bapoxonae paxam pomonae beta painya neexanae jiwi pam tsane pocotsi coyenewatha xua Nacom paca cana exana. <sup>11</sup>Icha

ichun cueicueijei, bu bara cueicueijei pocotsiwa Nacom cueicueijei exana bapon. Icha pebin yawena xua ichun yawenatsi bu bara barapo pebin yawena ichuntha po peayapusuwatha xua Nacom cata. Daxita pocotsiwan xua paexaname bara beta paexande xua jiwi wunae pejainchinexa Nacom xua beta painya neexanaexae xua Jesucristo peyabaraxae. Bu bara Jesucristo ataya xeinaena peainya cui coyenewa, yawano xeinaena xua peayapusu itorobi coyenewa. Je bara ichi tsane.

**Meje yabara po coyeneya xua bewa exanaetsi wajume cowuntsixae  
Cristo xua poxonae bequein ichamonae atene naca exana**

<sup>12</sup>Tamonae pam painya tapaca caantobetsi jiwichi pam iru painya nejume cowuntsixae Jesucristo. Jopa yabara pana nabenaecaeinde poxonae bichocono atene paca cana exana ichamonae painya nejume cowuntsixae Jesucristo. Jopa pananta xeinaeinde xua baxua pocotsiwa jopa bewa pacata exanae tsane. <sup>13</sup>Jame seicaya pajuntu coyene weiweinare xua painya nepaca itacupaewa xua ichamonae atene paca exana icha Cristo ichichi xua atene exanatsi. Yawano bexa pajuntu coyene weiweinaename poxonae Jesucristo yawa patopaetsica pia peainya cui coyenewa. <sup>14</sup>Icha ichamonae paca muxucona painya nejume cowuntsixae Cristo saya pajuntu coyene weiweinare, tsipei Nacom pia Pejumope tunaxu tatsi, po jumope pexeinya peitupanae coicha yawa popona, barapo pejumope paca yawa popona. <sup>15</sup>Jopa bewa paexanaem tsane xua ichamonae pajutebame xua daxota ichamonae paca atene exana. Matautano jopa bewa paexanaem tsane xua ichamonae piawan tatsi pacaibame xua daxota ichamonae paca atene exana. Matautano jopa bewa paexanaem tsane xua ichamonae pajuntu coyene anaepana exaname xua daxota ichamonae paca atene exana. Matautano jopa bewa paexanaem tsane xua ichun pajuntu coyene itorobame xua abe peexanaewa tsane xua daxota ichamonae atene paca exana. <sup>16</sup>Icha ichun atene exanatsi ichamonae, pejume cowuntsixae Jesucristo jopa bewa bapon aura tsane. Ichitha jame bapon bewa wunae jainchina Nacom tsipei atene exanatsi pejume cowuntsixae Jesucristo.

<sup>17</sup>Po matabitha aena Nacom tamropata pitaba xua Nacom yabara paebina daxita jiwi xua penatsicuentiwa xua abe peexanaexae, apara barapo matabi bayatha patopa. Barapo matabitha Jesucristo piamonae tatsi umenaena Nacom peitabaratha xua Nacom peyabara paebinexa tsane xua penatsicuentiwa xua barapomonae abe peexanaexae. Yaitama Nacom baxua nacata exana nama yatsicaya jopa Nacom juniya exanaeyo pomonaetha pomonae jopa pejume cowuntsiwi Nacom pia pecapanenebiyae diwesi tatsi. <sup>18</sup>Daunwei nawita pon capanepatsi abe pia peexanae cuiru coyenein weya pon wunae peexanaein. Ichitha nama bichocono tadaunweichi xua pon capanepatsi abe pia peexanae cuiru

coyene weya pon bichocono abe peexanaein. <sup>19</sup>Poxonae ichamonae paca atene exana, bara awiya beta paexande icha bara baraxua xua pocotsiwa Nacom cuita jichipa. Bewa pajume baru jejam tsane Nacom xua paexaname bara bequein paayapube taetham. Nacom paca necaforotsixae yawa peexanaexae xua pocotsiwa yabara paca tsiwunae muxu dubeiba xua exana paebeiba, daxota Nacom pia coya canamataxeina painya juntu coyene.

**Meje yabara xua Pedro muxuweta pomonaetha  
pomonaе pejume cowuntsi jiji**

**5** <sup>1</sup>Ichichipan xua tamuxu wetsiwa penapatae jiji pomonaе paxam jiwana pam pomonaе painya nejume cowuntsi jiji pam. Xan iru bichocono penapataein icha barapomonaе ichi. Xan natan poxonae Cristo naetotha tparucua exanatsi. Xan iru yawa xeinaein po peainya cui coyenewa Cristo xeina poxonae patopaetsica. <sup>2</sup>Beta pa-eeinare pomonaetha xua Nacom paca cana exana xua pamatacaponame, icha pon oveja peyapu eenaein ichi xua beta yapu eena ovejamonae. Jopa meisa baxua paexanaeinde xua poxoru Nacom pia paca necaitorobixae. Jame maisa baxua paexande xua poxoru painya coutha painya neichichipaexae. Baxua jame Nacom ichichipa. Matautano jopa baxua paexanaeinde xua poxoru paratixi painya neichichipaexae, ichitha poxoru Nacom painya neantobexae bichocono. <sup>3</sup>Jopa atsaquiya pamatacaponaeinde pomonaе xua pamatacaponame. Jame saya maisa beta pamatacaponde xua painya necacui taenexa xua bara juta ichiya peexanaenexa. <sup>4</sup>Nexata poxonae patopaetsica pon jiji itorobiya pepa Peewatsin, bapon Jesucristo paca catsina po pematomatsiwa peainya cui coyenewa, po peainya cui coyenewa xua bapana jopa weraweracaeyo.

<sup>5</sup>Barichi pomonaе pewowi jiji pam, bewa paexanaem pocotsiwa xua penapatae jiji paca itoroba. Daxita paxam bewa nantiya pana naantobem, yawa bewa nantiya pana nayabara ita ururanaya jinompaem. Baxua paexande tsipei Nacom Pejume Diwesitha jeye:

“Nacom aichaxaibi pomonaе peabiwi ichamonaetha.

Ichitha Nacom yawena xua peantobexae pomonaе

baru ita ururanaya jina ichamonae”, jei.

<sup>6</sup>Daxota papende po coyene xua paaebame ichamonae. Paexande pocotsiwa xua Nacom pecobetha paca ita cowai pia peayapusu itorobiwatha xua Nacom ainya cui paca necaexanaenexa tsane poxonae Jesucristo equeicha patopaetsica. <sup>7</sup>Bara pacopare xua Nacom bara daxita paca wepichina daxitan po coyenein xua juntu coyene natsepa paca cana exana tsipei Nacom paca yabara nanta xeina nawita xua painya nepaca cayawenaewa tsane.

<sup>8</sup>Painya coutha pana najuntu coyene itorobare xua beta pajinompare. Tsaca pajinompare poxoru caurimonae pia pentacaponaein tatsi ichichipa

paca abe exana. Bapon pacata exana icha neuthu ichi xua ba piyain fiba poxonaе jeita ducuaanaeta pon ichichipa bexaena. <sup>9</sup>Dota pam panaitemare bapon xua beta painya nejume cowuntsiwatha. Pananta xeinare xua daxita nacuanpiwi jiwana pomonaе pejume cowuntsiwi Jesucristo barapomonaе atene exanatsi icha paca ichi. <sup>10</sup>Ichitha bexa tsane xua caeto poxonaе paca atene exanaena ichamonaе, bapoxonaе Nacom paca juntu coyene xanepana exanaena. Yawano Nacom paca exanaena xua beta painya nejume cowuntsiwa tsane. Yawano paca exanaenano xua bichocono painya neajuntucoyenesuwam tsane. Barapon Nacom painya nepaca antobexae paca waba pia paca catichi po peainya cui coyenewa xua ataya tsiteca xua Jesucristo xeina. <sup>11</sup>Bu bara Jesucristo ataya xeinaena peainya cui coyenewa, yawano xua peayapusu itorobi coyenewa. Je bara ichi tsane.

### **Meje yabara poxonaе Pedro najume wetsiya paeba**

<sup>12</sup>Pon pewun Silvano, pon be tayapin tatsicotaein iruru pejume cowuntsixae Jesucristo, bapon cobe itoroban xua inta tina barapo peya cartiyo xua bapoxonaе tapacata itorobinexatsi xua tapaca muxuwetsinexatsi. Barapo cartatha paca juntu coyene tsacaba exanatsi xua Nacom xaniwaicha painya nepaca cayawenaewa tsane painya nepaca caantobexae. Daxota baxua awiya pajume cowuntsiya jinompare.

<sup>13</sup>Pomonaе Babilonia tomaratha jinompa pomonaе Nacom pejume cowuntsiwichi, barapomonaе paca jacoba. Barapomonaе pomonaе Babilonia tomarapiwi Nacom itapeta icha paca ichi xua paca itapeta. Iru Marcos paca jacoba be pon taxanto tatsicotaein tsipei yawenan xua pejume cowuntsiwa Jesucristo. <sup>14</sup>Paxam nantiya pana najacobare painya nenaantobexae.

Paxam pomonaе Cristo piamonaе tatsi pam barapomonaе pam bara Nacom junteма jinompa paca exana. Je bara ichi tsane.

Baja Pedro.